

CAPUT XII.

DAMNA PROPRIÆ VOLUNTATIS.

Quæcumque hic facimus propriâ voluntate Divinæ contraria, ligna sunt igne inextinguibili in futuro sæculo comburenda. Etenim infernus nihil aliud est quam propria voluntas, quæ si non esset, nec infernus nec dæmones essent. Propterea omne malum, omnisque calamitas infelicitum damnatorum, propria voluntas est, quæ Divinæ pervicaciter adversatur. Ita etiam in hoc mundo, quo minus homo propria voluntati adhæret, eo magis ab inferno elongatur, æternæque felicitati appropinquat. Et si qui forent in hac vita propriæ voluntatis omnino expertes, hi sibi possent regni cœlestis possessionem certa spe polliceri. Quomodo autem propria voluntas deponi debeat, paucis verbis Christus docuit cùm dixit: *Sequere me* (1). Cùm enim testatus sit se in hunc mundum venisse, non ut suam, sed ut Patris voluntatem faceret; ad hoc nostra voluntas inclinanda est, ut exuta omni proprietate, Christi crucem amplexatur naturæ amaram, spiritui dulcissimam. Hoc nimurum à nobis exigit Christiana professio, ut Christi exemplo in omni opere et eventu dicamus: *Non mea, sed Dei voluntas fiat*. Hoc requirit suprema et æterna voluntas, quæ omnes voluntates creavit et conservat, ut ad solum ejus obsequium et beneplacitum omnia opera nostra, omnia verba et co-

(1) Mat., viii, 22. — Marc., ii, 14.

gitationes dirigantur. Vera potitur libertate, qui in omni eventu sic ex animo loqui potest: Ita, Pater, quoniam sic fuit placitum ante te. Ego nihil volo nisi quod vult Deus. Ille sapienter disponit omnia, ejusque dispositioni tām in prosperis, quām in adversis me libentissimè subdo, non meam sed ejus gloriam querens, eo statu rerum contentus, quem ejus providentia ab æterno decrevit. Omnis turbatio hominum, et omnis anxietas ex eo nascitur, quod se subjecere Divinæ voluntati aut nesciunt, aut nolunt. Magna autem pena et intolerabilis illis est, qui hoc esse nolunt quod sunt.

CAPUT XIII.

UTILITAS SOLITUDINIS.

Ad exteriorum et interiorum hominis compositionem, inæstimabilis momenti est, corpore et animo solitarium esse, et proprium fundum colere in silentio. Ideò vir sapiens fugit hominum consortium, odit multiloquium, cunctis curiositatibus oculos et aures claudit, non se negotiis immiscet, sapientissimi viri sententiam in mente habens, *qui minoratur actu, sapientiam percipiet* (1). Deus unus, et solus est, nec ipsum reperire potest, qui solus non est. Quod si necessitas Deique gloria cogant aliquando virum sapientem exterioribus occupari, spiritus tamen ad interiorum recessum veluti ad suum cen-

(1) Eccl., xxxviii, 25.

trum tendit, ita ut magis in eo sit quām in opere exteriori, servata inter negotiorum curas mentis tranquillitate. Licet illi quacumque hora voluerit in animum suum secedere, in quo summam quietem reperit, benē omnibus intus compositis. Qui vero occupatur in circumferentia, et extremitate creaturarum, ad centrum suum, quod est Deus, nunquam perveniet. Imperitis et insipientibus poena gravissima est, paucis horis secum vivere, et sibi attendere. Ideo omnem curam, et industriam ad hoc applicant, ut sui obliscantur, et pretiosissimum tempus inutiliter prodigant. Ejus maximam partem usurpat sibi vitae hujus necessitates, quod verò reliquum est, tanta illos molestia vexat, ut sollicitè querant, quomodo illius jacturam faciant. Timent nimirum, ne, cūm soli sunt, de se cogitare cogantur: nihil enim in se reperiunt quod sibi placeat, et à seria sui consideratione avertunt se, solatia quārentes in creaturis, quia in se nihil inveniunt, nisi molestiam, tedium, et perpetuam agitationem. Fugunt itaque à seipsis, quia animam suam non vident qualem desiderant, sed nudam, deformem, plenam miseriis, onustam peccatis. Non igitur mirari oportet, quod pauci sint, qui ferre possunt soliditudinem; et fere omnes, turbas, negotia, et multitudinem obsidentem querunt, et amant; et si haec desint, se infelices arbitrantur; semperque reipsā infelicissimi erunt, donec discant secum vivere, et in seipsis atque in Deo requiescere. Docuit nos Dominus paucos electos esse, cūm multi sint vocati, ut discamus declinare à multis, et cum paucis vivere, atque etiam in-

ter paucos timere, quia nemo scit in quam paucitatem electi redigantur.

CAPUT XIV.

QUANTUM NOCEANT DIVITIÆ, ET QUOMODO ILLARUM
AMOREM COMPESCERE OPOREAT.

Quām sit perniciosus amor divitiarum, et quantum Christianis moribus, ac æternæ saluti aduersetur, discipulos suos Redemptor noster edocuit, cum præmisso juramento, ut in rebus gravissimis consueverat, ait: *Amen dico vobis, quia dives difficultè intrabit in regnum cœlorum* (1). Et quō altius hæc terribilis sententia audientium cordibus infigeretur, rei difficultatem exagerans adjecit:... *Facilius est camelum per foramen acus transire, quam divitem intrare in regnum cœlorum.* Porta siquidem cœlestis patriæ angusta est, nec recipit divitiarum sarcinis onustos. Opes itaque et pecuniam ita diligere debemus, sicut ægrotus amaram potionem, quam ut amaram aversatur, amat ut necessariam ad pristinam valetudinem recuperandam. Et ipsa quidem valetudo, cūm finis sit, propter se amatur, et sine mensura; pharmacum verò tantum diligitur, quantum satis est ad valetudinem, nec ullus æger reperitur, qui magnam pharmacorum copiam appetat; sed unicum, idque si fieri possit in minima quantitate, quam etiam prorsùs rejiceret, si posset

(1) Mat., xix, 23.

absque medicamine sanus fieri. Eodem animo erga divitias esse debet omnis Christianus, ut sint nostræ peregrinationis subsidia, non irritamenta cupiditatis; ut, quantum in ipso est, sine illis vivere cupiat; nam, sicut ait Apostolus, *est... quæstus magnus pietas cum sufficiencia* (1). Sanctus quoque senex Tobias monita salutis tribuens filio suo: *Noli, inquit, timere, fili mi: pauperem quidem vitam gerimus, sed multa bona habebimus, si timuerimus Deum, et recesserimus ab omni peccato* (2). Verè dives ille est, qui est dives æternitati, qui non opum, sed virtutum fructus recondit. Studium congerendæ pecuniae vix esse potest sine peccato; carnis siquidem et oculorum concupiscentia, atque superbia vitæ hominem vehementissimè afficiunt; et quia pecuniis, quibus omnia obediunt, facile consequimur quidquid appetimus, amor divitiarum hâc aestimatione ardentissimus est, et ad omne scelus impellit, dummodò quo cumque modo arcum nummis impleamus. Sicut pueri, cum testis ludunt, summâ attentione ludo incumbunt, testas verò negligunt: ita nos debemus vitæ curam habere, ad quam opes necessariæ sunt, ipsas verò negligere et ab his affectum avellere: nam si mens illis adhæreat, terræ affigitur, et deprimitur, et in vilissimam servitutem reditur. Sicut etiam pueri, cum nuces projiciuntur, eas avidè rapiunt, et pro iis colligendis secum decertant; viri autem eas spernunt: eodem modo viri justus, et timens Deum, si aurum, argentum, dignitates distribuuntur, viderint, inquit, pueri, mihi hæc omnia nuces sunt. Si alio

(1) I. Tim., vi, 6.⁷

(2) Tob., iv, 23.

projiciente in sinum meum nux inciderit, forsitan accipiam, et fractam comedam: at nunquam me inclinabo, nec alium evertam, ut tollam, quia nux tanti non est. Nec tanti sunt omnia exteriora, quæ in bonis non esse habenda fides docet. Filius Dei factus homo divitias habere noluit, ut à nobis contemendas esse ostenderet. Ideò filii hujus sæculi, qui spernere eas nolunt, Christum spernunt: filii autem Dei illic opes reponunt, *ubi neque erugo, neque tidea demolitur, et ubi fures non effodiunt, nec furantur*. In hoc mundo satis est dives, qui pane non indiget.

CAPUT XV.

DE USU DIVITIARUM.

Quis sit proprius et legitimus divitarum usus, pauci considerant: subsidia enim sunt humanæ vitæ, quas vir probus sine alicuius injuria congregat, sine affectu possidet, sine anxietate conservat, sine modestia erogat, et in usus necessarios honestè expedit. Cujusque autem necessitas ex proprii statûs conditione aestimanda est. Cum enim aliqui superiores sint, alii inferiores; quidam nobiles, alii ignobiles: hinc sanè fit, ut in gradu sublimiori constitutis plures opes sint necessariæ, ut honorificent ministrorum suum: aliis verò pauciores sufficient. Omnes autem bonorum suorum administratores sunt, quibus intra metam Christianæ modestiæ tanquam fi-

deles dispensatores pro se uti, et quæ supersunt egentibus largiri debent. Rerum nostrarum verus Dominus est Deus, nos cœnomi sumus, quâ consideratione etiam in affluentia divitiarum voluntariam paupertatem exemplo Sanctorum observare valemus, illud præstantes, quod scriptum est : *Divitiæ si affluant, nolite cor apponere* (1). Natura aurum abdidit in visceribus montium, et in profundis atque inaccessis fodinis : et ideò avari qui aurum querunt et diligunt, nusquam ad cœlum oculos elevant, sed ad terram proni sunt, in qua latet aurum, nec unquam ab illa emergunt. Sapiens vero, rerum omnium interitum brevi futurum, mente et spiritu præveniens, à rebus infimis avulsum cor cœlestibus applicat, ubi veræ sunt, et in æternum duraturæ divitiæ; illuc honorari desiderans, ubi nemo indignus honoratur : ibi regnare optans, ubi adepto regno nihil timetur. Omnia, quæ in terris possidet, immolat Deo, paratus his carere, si Deus voluerit. Porro cor nostrum alienum esse à divitiis facilè his indicis cognoscemus : si firmiter credamus eas onus esse, earumque pondus sentiamus : si fastidio nobis sint, atque illis carere sine dolore possimus : si de illarum possessione non gloriemur : si persuasum nobis sit, pretiosam supellectilem, magnificas ædes, et reliqua ejusdem generis, propter quæ opes comparantur, nihil aliud esse quam trophyæ humanæ vanitatis, et salutis impedimenta. Nihil turbare non poterit, si liberi fuerimus ab omni opum affectu. Securus est, qui nihil potest amittere. Quemadmodum præstabilius est in angusto cubili benè valere, quam

(1) Ps., lxi, 11.

in amplio thalamo ægrotare : sic præstat in paupertate tranquillè vivere, quam in multis opibus mœstem esse. Animus suâ sorte contentus beatus est.

CAPUT XVI.

QUI SINT PAUPERES SPIRITU.

Regni cœlestis possessionem in paupertate spiritus constituit Christus cùm dixit : *Beati pauperes spiritu : quoniam ipsorum est regnum cœlorum* (1). Verè autem pauper spiritu ille est, qui nec divitias desiderat, nec in his pacem habet : in cuius possessionibus et desideriis nihil est quod demi possit ; qui multò majori anxietate metuit, ne dives fiat, quam filii hujus sæculi ne incident in paupertatem : qui super omnia creata in sublime elatus, è superiori parte spiritus sui sic loqui potest : Dives sum ego Dei gratiâ, et abundo, quia jam habeo quod concupisco, et hoc ipsum quod habeo sine adhæsione possedeo, atque illo carere possum sine dolore, et detrimento. Veritas incommutabilis in me manens ineffabiles divitias suas ostendit mihi, quarum possessione beatus sum. In ea veritate omnia continentur, et ultra ipsam nihil requiro. Ibi clarissimè perspicio, quod ex me nihil habeo, nihil sum, nihil possum. Ibi clamat Veritas voce terribili, ut omnia inferiora quæ per se vera, et per se bona non sunt, et quæ non sunt unum cum ipsa, nullo modo audeant ad me accedere, aut animæ facultatibus aliquam sui spe-

(1) Mat., v, 3.

ciem ingerere. Ibi video et cognosco omnia nihil esse, nihilque mihi contingere posse, nisi ipsa sempiterna veritas permittat, ipsa nimirum æterni Patris æterna providentia, quæ me nudum in hunc mundum de utero matris eduxit, et nudum inde extrahet in sinu terræ sepiendum tempore præfinito. Hæc ex sublimi scientiâ sanctorum è throno Altissimi infusâ, verè et ex animo effantur veri pauperes spiritu, et ideo ipsum regnum cœlorum esse Christus asseruit, quia nihil in eis, quod terram sapiat, reperitur. Atque utinam hanc veritatem omnes Christiani benè perciperent, nam perituras Mundi divitias nemo quæreret, nemo diligeret: sed sicut pauci sunt electi, ita pauperes spiritu pauci sunt. Dicit Scriptura beatum illum esse, qui post aurum non abiit, nec speravit in pecunia et thesauris: et quia paucorum hæc virtus est, subdit: *Quis est hic et laudabilis eum? fecit enim mirabilia in vita sua* (1). Verè siquidem mirabile est hominem reperire qui nihil eorum concupiscat quæ mundus admiratur, cui paupertas divitiæ sint, qui vitæ humanæ subsidiis è moderatio utatur, quam Lex æterna præscribit, atque omnia exteriora ita possideat, ac si sua non essent. Ideò pauci omnino sunt, qui ad hanc perfectionem perveniant, quia vitam ejusque commoda, quæ divitiis parantur, pauci sunt qui negligant, pauci qui Christo credant præcipienti ut primò quæramus regnum cœlorum; nam cætera adjicenter nobis (2). Idem seriò admonuit nos, ne de cibo et pôtu, aut de vestimento solliciti simus; Pater

(1) Eccl., xxxi, 9.

(2) Mat., vi, 33.

enim cœlestis scit, quia his omnibus indigemus. Cur igitur Deo non credimus? cur de Patris providentia diffidimus? Obstant nimirum, ne credamus vincula cupiditatis, quibus irretiti aures claudimus veritati, atque humi defixi oculos in cœlum tollere non valemus. Angustus admodum trames est, per quem veritas ducit hominem in cœlum. Hunc tenere non potest, nisi qui fuerit expeditus et nudus. Locupletes autem ingentibus sarcinis onerati, per viam mortis incedunt, quæ latissima est. Quid ergo prodest cunctis sæculi opibus affluere, si divitiis caremus, quæ permanent in æternum? Exules sumus et peregrini, qui ad patriam pergimus, iter autem agenti per loca angusta et difficilia minuenda sunt, non augenda impedimenta.

CAPUT XVII.

QUÆ, ET QUALIS SIT OBLIGATIO FACIENDI ELEEMOSYNAM.

Divitiæ, quæ ad vitam corporalem, et ad decenniam statûs necessariæ non sunt, sine periculo æternæ salutis retineri vix possunt, et in vanos ac profanos usus expendi, illæ præsertim quæ ex redditibus ecclesiasticis congestæ sunt, sed pauperibus subveniendis, vel ad honorem Dei erogandæ sunt. Laus omnis et bonitas pecuniarum in usu consistit; vitiosæ et inutiles sunt, cùm in arca servantur, cùm nihil ex illis coelestibus thesauris infertur; cùm soli possidenti servint; cùm nec pauper auxilium, nec peregrinus solatium, nec alii egentes ex illis sub-

sodium percipiunt. Opes, possessiones, thesauri, et alia ejusdem generis bona, ab hominibus vocantur, non quòd aliquem bonum faciant, sed quia ex his bonum operari possumus; piis enim largitionibus augetur justitia, sicut scriptum est: *Dispersit, dedit pauperibus: justitia ejus manet in saeculum saeculi* (1). Salomon quoque ait, *Redemptio animae viri, divitiae suae* (2). Et alio loco, *Ignem ardenter extinguit aqua, et eleemosyna resistit peccatis* (3). Quemadmodum Christianæ fidei, et pietati nihil magis congruit, quam egenorum paupertati succurrere, et propriæ conditionis in aliorum necessitatibus meminisse: ita nihil crudelius, et magis noxiū, quam necessaria non solum egentibus, sed proprio etiam corpori subtrahere, ut congregentur opes, et hereditibus serventur, qui illas brevi tempore dissipabunt. Sed multo major, et nunquam satis deploranda calamitas est animam suam perdere, ut alii ditescant. Quomodo verò et quando lethalem culpam incurant, qui superflua non erogant, hic non disputo; nam hoc speciatim determinare non est humanæ scientiæ, sed Christianæ prudentiæ, quæ docet unctione magistrâ, quid et quantum quisque debeat sibi adimere, ut indigentis vel gravi vel extremæ necessitati subveniat. Rursum quæ sit gravis, aut extrema necessitas, hic non exquirō; sed audio Dominum sine distinctione præcipientem, *Quod superest, date eleemosynam* (4). Audio Joannem Bap-

(1) Ps., cxi, 9.

(2) Prov., xiii, 8.

(3) Eccl., iii, 33.

(4) Lue., xi, 41.

tistam, qui prædicans pœnitentiam, et requisitus à turbis, quid illis faciendum esset, respondit: *Qui habet duas tunicas, det non habenti: et qui habet escas, similiter faciat* (1). Audio prophetam psalgentem: *Beatus qui intelligit super egenum et pauperem: in die mala liberabit eum Dominus* (2). Audio Esaiam qui ait: *Frange esurienti panem tuum, et egenos vagosque induc in domum tuam: cum videris nudum, operi eum, et carnem tuam ne despixeris* (3). Audio sanctissimum senem Tobiam his verbis filium instruentem: *Ex substantia tua fac eleemosynam, et noli avertire faciem tuam ab ullo paupere: ita enim fiet ut nec à te avertatur facies Domini. Quomodo potueris, ita esto misericors. Si multum tibi fuerit, abundanter tribue: si exiguum tibi fuerit, etiam exiguum libenter impertiri stude. Praemium enim bonum tibi thésaurizas in die necessitatis. Quoniam eleemosyna ab omni peccato et à morte liberat, et non patitur animam ire in tenebras* (4). Quid amplius dici potest? nam etiam de exiguo dandam esse eleemosynam monet, ut à peccatis, et à morte perpetua anima nostra liberetur. Sed et Apostolus audiendus est, quem diligebat JESUS, sic fidelibus scribens, *Qui habuerit substantiam hujus mundi, et viderit fratrem suum necessitatem habere, et clauerit viscera sua ab eo: quomodo Charitas Dei manet in eo* (5)? Quod si Charitatis non est in illo, erit concupiscentia mala,

(1) Lue., iii, 11.

(2) Ps., xl, 2.

(3) Esai., lviii, 7.

(4) Tob., iv, 7.

(5) I. Joan., iii, 17.

et partem habebit in futuro sæculo cum illo divite, qui induebatur purpura, et byssso, et epulabatur quotidie splendide, negatâ Lazaro mendico alimoniâ de mîcis ab ejus mensa cadentibus (1). Clamat intus conscientia et magnis vocibus avarum divitem interpellat dicens, cur pauperem esurientem à te repellis? Si non pavisti, occidisti. Panis, qui tuis usibus superest, esurientis est: nudi sunt vestes, quæ apud te marcescunt: egentis est aurum, quod in arca custodis. Christus in extremo judicio æternis ignibus damnabit impios, quia misericordiae opera indigentibus denegarunt: nam dicet: *Esurivi et non dedistis mihi manducare: sitiui et non dedistis mihi potum: nudus eram, et non operuistis me* (2). Nec ullam gravissimæ, sive extremæ necessitatis mentionem facit. Vix enim totius vitæ decursu aliquis occurrit, tantâ pressus egestate, ut sine alterius ope vivere nequeat, nec aliis inveniatur, qui ei velit et possit opem ferre, idque nobis certum sit. Rarò hæc conditiones occurrent, et si istæ attendendæ forent, nullus ferè locus eleemosynis relinqueretur. Danda igitur eleemosyna est, ex eo præcisè quod quis superfluum habet; nam misericordia plenitudo virtutum est: nec, ut multi faciunt, ad vitæ finem differendæ sunt piæ largitiones; longè enim minoris pretii apud Deum sunt quæ testamento legantur, quam quæ vivens, et retinere valens piâ liberalitate largitur.

(1) Lue., xvi.

(2) Mat., xxv, 42.

CAPUT XVIII.

PATIENTIE NECESSITAS.

Inter cæteras Christianæ disciplinæ partes, quæ ad vitam æternam consequendam necessariæ sunt, nulla melior, nulla utilior patientiâ, per quam homo Dei longanimitatem imitatur, qui tot mortalium sceleribus provocatus patientissimè tolerat, neminem à suis beneficiis excludit, Solemque suum oriri facit super justos et injustos. Patientia iram temperat, linguam frænat, mentem regit, pacem custodit, imperium frangit, simulantes extinguit, fastum comprimit, mundum vincit, carnem coerget, facit humiles in prosperis, in adversis fortes, mites in contumeliis, tentationes expugnat, persecutiones sustinet, vitam perficit et coronat. Ut nihil malorum fiat, hæc sola efficit, quâ si omnes prædicti essent, nullum scelus, nulla fraus in rebus humanis foret. In hoc sapiens ac bonus vir à malis et insipientibus differt, quia habet invictam patientiam, quâ illi carent. Magna itaque virtus est tolerantia, omnibus vitiis et affectibus opposita, propter quam vir justus variis adversitatibus à Deo probatur, ut mala, quæ inferuntur aut accident, æquanimiter ferre, sibique imperare, ac se regere discat. Nam quia naturæ repugnare non possumus, nec impedire, ne animus laccessitus injuriâ commoveatur, hæc virtus necessaria est, quæ animum fluctuantem contineat, ne prosiliat ad nocendum, atque hominem sibi reddat infensum.

Ipsimet Philosophi maximis laudibus patientiam commendarunt, omnem sapientiae sue ostentationem ex ea proferentes : sed apud illos sicut falsa sapientia, ita falsa patientia fuit : Deum enim ignorantes tantum à vera sapientia aberant, quantum ab ejus auctore distabant. Nos autem Christo docente didicimus, oportere nos per multas tribulationes introire in regnum Dei, et hæc est vera sapientia scire Christum, et hunc crucifixum, ejusque crux diligere, et alacriter ferre. Nam cùm debeat Christiani vita Christi patientis redhibilio esse, qui crucem aversatur Christianus non est. Nemo speret se futurum sine flagello ; flagellat enim Deus omnem filium quem recipit : nullus excipitur, etiam unigenitus Filius, qui solus fuit sine peccato, non tamen fuit sine flagello ; nam oportuit eum pati, et ita intrare in gloriam suam. Unusquisque hominum pœnus et malis hujus vitæ aut exercetur ad purgationem, aut admonetur ad conversionem. Quantumcunque vero quis patiatur, ad Christi tormenta, ad ejus ignominiam, et crucem nunquam perveniet.

CAPUT XIX.

ADVERSITATES EXERCENDÆ VIRTUTIS OCCASIO SUNT.

Vita nostra via est, quā ad patriam pergimus. Nulla viæ conditio illi deest. Itur aliquando per plana, aliquando per aspera : sunt loca amena, sunt senticosa, sunt prærupta, et inaccessa. Aliquando turbæ comprimunt ; mox solitudo est. Sunt à bestiis

pericula, sunt à latronibus. Nunc pluit, nunc sudum est. Oppositiones et adversitates ubique sunt, atque etiam in ordine gratiæ locum habet cuiusdam Philosophi sententia, *omnia fieri secundum litem*. Virtus enim non acquiritur sine oppositione, nec potest homo agnoscere quantum fortitudinis habeat, si desint adversitates et tribulationes. Si quis stultorum vocibus, quorum immensa turba est, ad cœlum extolleretur, si nemo illi auderet contradicere, si mensa illi pretiosis dapibus affluens sterneretur, si res ejus familiaris fideliter administrata magno sumptibus idonea foret, si ædificiorum excelsæ moles habitaculum illi præberent ; si omnes in illum honores, omnes dignitates, omnes deliciae confluenterent : quis esset adeò facundus et eloquens, ut illi persuadere posset inania esse hæc omnia, quæ vulgus bona vocat, mala autem hujus vitæ Dei beneficia esse, quibus nos præparat ad æternam beatitudinem consequendam ? Ideo electos suos exercet Deus adversitatibus, ut propriâ experientiâ discant, quā fluxa, et fragilia sint, quā plena miseriis quæcumque mortales bona esse arbitrantur : et è contrario quā bona sint, quæ homines mali, mala esse credunt, ac si nihil pati, maximum sit hominis bonum. Sapientis igitur est inter omnia contraria et obstantia divinæ Providentiae, læto animo obsequi, et cor suum eo loco figere, ubi nulla perveniunt vitæ hujus incommoda. Sæviant homines mali adversus bonos quantum voluerint, quantum permitti fuerint ; ruant in eos, agmine facto, cunctæ calamitates, non contristabit justum quidquid ei acciderit (1).

(1) Prov., xii, 21.

lem virum nec felicitas corrumpit, nec frangit adversitas; dicit enim in omni eventu: *Planè hæc infirmitas mea est, et portabo illam* (1). Sic debet fieri, sic volo ut fiat. Omnis creatura velit, nolit, uni Deo subjecta est; sed alii obediunt ut filii, et faciunt quod justum est: alii patiuntur ut servi, et fit de illis quod justum est. Nemo Dei leges evadit, aut facit homo quod lex jubet, aut patitur quod lex decernit.

CAPUT XX.

PATIENTER PERENDA QUÆ QUOTIDIÈ OCCURRUNT.

Multi sunt, qui graves sibi cruces et tribulaciones eventuras singunt, quas patientissimè ferre proponunt; et hâc rerum, quæ nunquam erunt, inani specie delusi eximum patientiæ actum se exercuisse arbitrantur: cùm interim multò minores cruces, easque præsentes totis viribus fugiant, et abominentur. Tollendus hic error est, et solerter advertendum in magnis rarissimè, in minimis frequenter adesse patientiæ occasionem, quæ quotidiè, ac omni ferè momento exerceri potest aliena mala tolerando, propria corrigendo. Libentiū autem ea crux amplexenda, quam Deus immittit, nam quæ propriæ voluntate assumitur, non semper à Deo est. Sicut gaudent infirmi, cùm in medicum peritum incidunt, qui lethalem corporis ægritudinem curare sciat, et velit: ita nos calumniis, injuriis aliisque molestiis

(1) Jerem., x, 19.

lacesisti gaudebimus, et exultabimus, quod aliquis repertus sit, cuius operâ animæ nostræ vulnera sanentur, et summis apud Deum opibus locupletemur. Quidquid verò evenerit, libenter amplectemur, placet enim quod libet, et ea dumtaxat molesta sunt, quæ non libent. Qui volens, et lubens patitur, et minus patitur et meritum auget. Nec obest reluctantis naturæ repugnantia, dummodo contrarii motus ad partem rationalem, in qua meriti et demeriti sedes est, non perveniant, imò hæc obnitatur, Deique opem ferventi oratione depositat. Quod si murmuraverit, si conturbatur, si omiserit quæ propriæ muneras sunt, signum erit voluntariæ rebellionis, quandoquidem ad ea impellit, quæ non nisi deliberato animo fieri possunt. Virtutes, quæ in actione consistunt, facile exercentur: at quæ in tolerantia versantur, difficillimæ sunt, quia illarum usus extra nos est, istarum in nobis; illis natura consentit, istis repugnat. Cæterum moderatè, et toleranter ferendi propter Deum quæcumque adversa singulis diebus contingunt, exemplum præbent milites, quorum tolerantia incredibilis est. Nam quæ itinera, quæ frigora, quos soles, quantas necessitates, quæ vulnera, quæ pericula patiuntur, et hæc omnia hilari animo, ut paucos dies selectus quietos habeant, ad quos nesciunt utrum pervenient? Nos verò pro æterna requie brevissimi temporis labore non sustinebimus? Tolerabilia et levissima fient quæcumque patimur, si præmium consideremus, quod Deus promisit.

CAPUT XXI.

GAUDENDUM IN TRIBULATIONIBUS.

Sicut in ædificio plus operis et sectionis uni saxo quam alteri adhibetur, jubente et disponente architecto, qui unum præ altero nobiliori loco destinavit: sic à Dei arbitrio petenda est ratio, cur unus graviora, alter minora patiatur adversa: unicuique enim propriam crucem tribuit Deus, singulorum viribus æquam, et parem gloriae ac coronæ, quam singulis præparavit. Sicut igitur marmor, si compos rationis foret, sculptoris ictus patienter ferret, et gratias ageret: ita nos gaudere oportet, quod variis tribulationibus quasi quodam scalpeilo nos Deus expoliare dignetur, ut sublimiori loco in domo ejus collocebatur. Castigat ille quos amat, ne mundi prosperitate corrupti, à via salutis aberrent. Ideò mali homines bonis sunt necessarii, ut per illos tanquam Dei ministros exerceantur, et ad virtutem assiduis afflictionibus obdurentur. Quod cùm verissimum sit, ille affectus erga adversarios induendus est, quem erga Semei sibi maledicentem Sanctus rex David ostendit, dicens, *Dominus enim præcipit ei, ut malediceret David: et quis est qui audeat dicere, quare sic fecerit* (1)? Nemo enim malum inferret, nisi Deo volente et permittente: nec ille vellet, aut permitteret, nisi ad maiorem sui gloriam et salutem nostram. Porro in ma-

(1) II. Reg., xvi, 10.

lis, quibus vexamur, non à creaturis solarium pertendum est, sed à solo Deo, qui prima causa omnium pœnarum est. Nam vera consolatio non nisi in veritate reperitur, quæ Deus est. Hæc docet nos tribulationem necessariam esse, et cum gudio suscipiendam veluti arrham, et pignus Divinæ erga nos dilectionis. *Omne gaudium*, ait Jacobus Apostolus, *existimare, fratres mei, cum in tentationes varias incideritis: scientes quod probatio fidei vestrae patientiam operatur, patientia autem opus perfectum habet* (1). Insidiæ, calumniæ, persecutio[n]es, et alia mala hujus vitæ, maximum bonum sunt, et maximè diligendum, quia in illis nihil est boni, nihil amabile præter Divinum beneplacitum, ad quod tanquam ad primum principium cuncta revocari debent, quæ carni et sanguini molesta sunt. Iniquo judici Pilato dixit Christus, *Non haberes potestatem adversum me ullam, nisi tibi datum esset desuper* (2). Hæc agnitiæ in omni eventu potestate, absque ulla difficultate mentis tranquillitas conservatur. Quæcumque nos angunt, si extra Deum considerentur, mille phantasmatæ et distractiones pariunt. Cum enim extra centrum suum trabuntur, incipiunt gravia esse, multaque suggestunt phantasiæ præterita, præsentia, et futura, quæ nunquam fuerunt, nec sunt, nec erunt: atque hinc oriuntur angustiæ cordis, noctes insomnes, et curæ insanabiles. Quod si quis assuescat omnia in Deo conspicere, et ad ipsum referre, semper hilaris et immotus dicet in omni eventu cum S. Job, *Sicut Domino placuit, ita fac-*

(1) Jac., i, 2.

(2) Joan., xix, 11.

tum est : sit nomen Domini benedictum (1). Deus qui me affligi permittit, mei curam gerit infinita charitate. Ipse me cruci affixit, in qua constanter permanebo donec ipse me deponat.

CAPUT XXII.

TOLERANDÆ DETRACTIONES.

Si magis angimur propter ea quæ de nobis pereram loquuntur homines, quam propter peccata, quæ sola nos cruciare debent, manifestè convincimus, quod nos ipsos magis amamus quam Deum. Infinitæ et horribiles sunt blasphemiae à perditis mortalibus contra Deum prolatæ, et ille hos tolerat, suorumque donorum participes facit: nos autem repleti vitiis et sceleribus, si quis nobis mala, quæ facimus, exprobraverit, excandescimus, et à nemine contemni volumus. Illud potius metuendum, ne imeritis laudibus extollamur, ne nimia nos felicitas à crucis Christi consortio, et ab ejus gloria excludat. Si appendenterentur veluti in statera quidquid memerum pro peccatis nostris, quidquid Christus pro nobis pertulit, in altera verò lance omnia tormenta, omnes injuriæ, omnia dedecora ponerentur, hæc certè præ illis, ac si nullius ponderis forent, levissima apparerent. Considerandum quoque est, quælibet ab aliis illata mala non ab inferentis, sed à patientis affectu gravia vel levia constitui. Nam qui hæc sper-

(1) Job., i, 21.

nit, qui non accipit, qui vulnere superior est, nihil patitur. Non manus quæ tela vibrat vulnus facit, sed corpus quod patitur: nam si quis corpus adamantine habereret, licet innumeris undique telis percuteretur, nullo vulnere affici posset: ita injuria, oblocutiones, et alia mala non à petulantium, et improborum insania lœdendi vim habent, sed à Patientis imbecillitate. Beatus est, qui vitam suam ita disposuit, ut de illo quidpiam sinistri ne fingi quidem possit, pugnante meriti magnitudine adversus malignantium obtrectationes. Quod si hoc assequi non valemus, hanc saltem diligentiam vitæ nostræ adhibere par est, ut nemo in nobis detrahendi occasio nem inveniat, alioquin frustrè detractoribus irascimur, si nos illis detrahendi materiam suppeditamus. Si verò nobis cuncta solicite ad honestatem providentibus, illi nihilominus insaniunt, consolari nos debet Redemptoris nostri semper memoranda sententia: *Beati estis cùm... dixerint omne malum adversum vos mentientes* (1). Sentiant de nobis homines, et dicant quidquid libet, beati erimus si nostra nos conscientia apud Deum non accuset. Fallaces et mutabiles sunt hominum opiniōnes, vana iudicia, quæ nec prosunt nobis, nec obsunt. *Si adhuc hominibus placet*, inquit Apostolus, *Christi servus non essem* (2). Sed nec fieri quidem potest, ut quis omnibus placeat: nam velle suum cuique est, trahitque omnes diversa, et unumquemque sua voluptas, et qui ab uno laudatur, ab aliis deridetur. Quidam Philosophus dicenti sibi, omnes te derident,

(1) Matth., v, 11.

(2) Gal., i, 10.

respondit : at ego non derideor. Illos siquidem irriteri non posse judicabat, qui derisionibus non perturbantur.

CAPUT XXIII.

TAM PROPIA, QUAM ALIENA MALA EQUANIMITER FERENDA.

Optimum remedium est, in omni afflictione et adversitate, à præsenti angustia mentem avertere, et ad Deum convertere, nostra quippe natura angorem suum conspicere nequit sine affectu miserationis erga se ipsam. Tum quia omnis cruciatus et ægritudo animi ex eo provenit ; quod rem, quam amamus, amittere timemus ; efficacissimum omnium malorum alexipharmacum est illud solummodo bonum amare, quod nulli subest mutationi , nec ab ulla creatu potentia auferri potest, aut impediri. Ab aliquo autem verbo, vel facto læsi, linguam omnino continere debemus, ne in verba erumpat animi commotionem indicantia : sicut enim languentis stomachi est non posse cibum duriorem concoquere, ita animi pusilli est, aspera verba ferre non posse. Dicebat quidam vir sanctus, se nullam unquam habuisse adeò gravem afflictionem, quam tacendo non vicerit ; nam quidquid sit quod cruciat, spretum exolescit : si vero irascimur acceptâ injuriâ, eâ nos dignos fuisse testamur. Dignus est contemni, qui de contemptu dolet. Non tamen sufficit dolorem intus premere, et tacere, sed intus etiam se arguere oportet, et omni

abjectione dignum aestimare. Etenim vir sapiens , qui se attentius circumspicit, non considerat quid patiatur, sed quâm multa dignus sit pati propter peccata, quibus Deum offendit. Alios autem non jucicat, ne scipsum damnet, memor Apostoli dicentis, *In quo enim judicas alterum, te ipsum condemnas : eadem enim agis quaæ judicas* (1), neque offenditur ob exiguum proximi debitum ipse debitor decem millium talentorum. Insanus est, qui suo graviori morbo, impatientiâ scilicet et superbiâ, alienum curare nititur. *Tu quis es*, inquit Apostolus, *qui judicas alienum servum ? Domino suo stat, aut cadit* (2). Aut quomodo potes dicere fratri tuo, ut in Evangelio legimus, *Frater, sine ejeciam festucam de oculo tuo : ipse in oculo tuo trahem non videns* (3). Solus Dei est aliena delicta judicare, cuius est ea justè punire, aut misericorditer curare. Ad nos autem spectat, ea si possumus corrigere, et impeditre ; alioquin patienter ferre ; nam si vitium displicet, illud prius in nobis emendandum est, quâm in aliis. Qualis Deus erga nos est, patiens scilicet, et misericors, tales nos aliis exhibere debemus.

(1) Röm., ii, 1.

(2) Ibid., xiv, 4.

(3) Luc., vi, 42.